
TO'QSONBOSTI EKINLARINI EKIB, QO'SHIMCHA DAROMADGA EGA BO'LING. O'ZBEKISTON FERMER, DEHQON XO'JALIKLARI VA TOMORQA YER EGALARI KENGASHI RAYOSATI A'ZOLARINING FERMER, DEHQON XO'JALIKLARI VA TOMORQA YER EGALARIGA MUROJAATI

Qadrli yurtdoshlar!

Hurmatli dehqon va fermerlar hamda tomorqa yer egalari!

Keyingi yillarda yer yuzida ro'y berayotgan iqlim o'zgarishlari, tabiiy ofatlar va qurg'oqchilik kabi holatlar oziq-ovqat mahsulotlari yetishtirishni qiyinlashtiryapti. Albatta, bu holat bizga ham o'zining salbiy ta'sirini ko'rsatmoqda.

Ana shunday holatlarning oldini olish maqsadida mamlakatimizda so'nggi yillarda Siz, fermer, dehqon xo'jaliklari va tomorqa yer egalari Prezidentimiz tomonidan ko'plab Farmon va qarorlar qabul qilinib, buning natijasida joylarda ulkan yutuqlarga erishildi.

Jumladan, agrar tarmoqda ishlab chiqarish hajmi ikki barobar oshdi. Shuningdek, oziq-ovqat xavfsizligini ta'minlash jamiyat ijtimoiy-iqtisodiy holatini barqaror rivojlantirish, fuqarolarning sog'ligi va hayotini yaxshilashning asosiy yo'nalishlaridan biriga aylandi.

Yangi O'zbekistonning 2022 — 2026 yillarga mo'ljallangan taraqqiyot strategiyasida ham ushbu sohani keyingi 5 yillikda jadal rivojlantirish istiqbollari belgilab berildi. Qishloq xo'jaligini ilmiy asosda intensiv rivojlantirish orqali dehqon va fermerlar daromadini kamida 2 baravar oshirish, qishloq xo'jaligining yillik o'sishini kamida 5 foizga yetkazish vazifasi mustahkamlandi.

Aslida buning zamirida Siz va bizning fidoyiligimiz orqali mamlakatimizning iqtisodiyotiga hissa qo'shishdir. Shu muqaddas zaminda tavallud va tarbiya topgan, o'zini aynan shu yurt farzandi deb bilguvchi inson o'z davlati, xalqi oldidagi, uni umidlar bilan tarbiyalagan, voyaga yetkazgan jamiyat oldidagi burchini ado etishi kerakdir.

Himmati baland dehqon va fermerlar hamda tomorqa yer egalari!

Farg'ona shahri aholisini yil o'n ikki oy vitamanga boy qishloq xo'jaligi mahsulotlari bilan ta'minlash, xalqimiz dasturxoniga yetkazish, bozorlarimizda narx-navo oshib ketishining oldini olish eng asosiy vazifamiz ekanligini unutmasligimiz zarur.

Xalqimizda **“To'qsonda sug'orsang, to'qson botmon hosil olasan”**, degan purma'no naql bor. Bunda qishning to'qson kuni nazarda tutilgan. Bu naql bejiz aytilmagan, negaki mutaxassislarning ta'kidlashicha, kuzda ekilib, qor ostida qoldirilgan sabzavot ekinlari urug'lari erta ko'klamda yerdan juda barvaqt unib chiqib, tez rivojlanishi hisobiga erta hosil beradi. Erta bahorda esa mahsulotning bozori chaqqon bo'lishi sir emas.

Dehqonchilikning **to'qsonbosti usuli** yaxshigina daromad manbai bo'lish bilan birga, aholining ertangi sabzavot mahsulotlariga bo'lgan talabini qondirish imkonini beradi. Natijada qish va bahor oylarida ham bozorlarimiz to'kin-sochin, narx-navo barqaror bo'ladi.

Keling, bugundan mas'uliyatimizni yanada oshirib, 2025 yil hosili uchun **1,6 ming** gektar maydonlarda piyoz, sarimsoqpiyoz va to'qsonbosti ekinlarini o'z vaqtida ekishni tashkil etaylik.

Mirishkor fermerlar!

Keyingi yillarda mamlakatimizda qishloq xo'jaligi sohasida amalga oshirilayotgan keng ko'lamli islohotlarimizda asosiy e'tiborni suv va yer resurslaridan oqilona foydalanish, ishlab chiqarishga zamonaviy texnologiyalarni faol joriy etish, xo'jalik va korxonalarining moddiy-texnik bazasi va kadrlar salohiyatini mustahkamlash, eng muhimi, biz fermerlarning og'irini yengil qilishga qaratilmoqda.

Ushbu imkoniyatlarni his qilib, **559** gektar bog'-tok orasiga hamda bo'sh turgan maydonlarga piyoz, sarimsoqpiyoz va to'qsonbosti ekinlarini ekib, mamlakatimiz aholisini arzon mahsulotlar bilan ta'minlashga o'z hissangizni qo'shing hamda mahsulotingizni eksport qilib, hisob raqamingizda valyuta tushumini qiling!

Aziz dehqonlar

Prezidentimizning 2021-2023 yillardagi qarorlarida asosida Qoraqalpog'iston Respublikasi va viloyatlarda fermer xo'jaliklari va klasterlar foydalanishdagi paxta va g'alladan qisqartirilgan **259** gektar ekin maydonlarini Siz dehqonlarga 10-sotixdan 1 gektargacha qilib bo'lib berildi.

Aynan ushbu maydonlar Sizlarga bejizga ajratib berilmaganligini isbotlash vaqti keldi.

Keling, Sizlar ham o'zlaringizga yuklatilgan majburiyatlarni yurakdan his qilib, **53** gektar maydonga piyoz, sarimsoqpiyoz va to'qsonbosti ekinlarini ekib, **2-3 marta** hosil olish tizimini yilga qo'ying, buning hisobiga gektaridan **80-100 mln** so'mgacha daromad oling!

"Bir kontur - bir dala" tamoyili asosida mahsulot yetishtirib, sarflagan urug'liklar va ko'chatlar uchun "Yoshlar ishlari agentligidan" subsidiya mablag'lari oling!

Kooperatsiyalar tashkil etib, mahsulotlaringizni eksportga chiqarib, qo'shimcha daromad olishga erishing!

Hurmatli tomorqa yer egalari,

Yurtimizning barcha hududida mehnatidan baraka topayotgan tajribali tomorqa yer egalari va fidoyi dehqonlar ko'pchilikni tashkil etadi.

Tomorqa har bir oilaning bamisoli xazina manbai. Ayni vaqtda mamlakatimizda **26.6 mingdan** ortiq tomorqa yer egalari **799 gektar** unumdor ekin maydonida mehnat qilmoqdasizlar.

Serhosil yerimiz, daromad olishga tomorqamiz bor ekan, doimo undan unumli foydalanish, xonadonlarimizni obod, yashash sharoitimizni namunali tarzga keltirish payida bo'laylik. Bu kabi tartib-taomil asosida ulg'aygan farzandlarimiz ham yaxshi yashashga intilib, o'z kelajagi uchun astoydil harakat qiladi.

Ko'pni ko'rgan, tajribali dehqonlarimiz fasllar almashayotgan, ushbu betakror kuz pallasida qanday yumushlarni bajarish zarurligini juda yaxshi bilamiz. Tabiat injiqliklari bilan kurashaverib toblangan dehqonlarimiz ayni kunlarda har bir daqiqani g'animat bilib, undan unumli foydalanaylik.

Farg'ona shahri **aholisi** tomorqangizga piyoz, sarimsoqpiyoz va to'qsonbosti ekinlarini ekib, qo'shimcha daromadga ega bo'ling!

Aziz mirishkor dehqon va fermerlar hamda tomorqa yer egalari,

Quyidagi tadbirlarni og'ishmay amalga oshiring!

birinchidan, ayni damlarda bog'-tok orasini, ajratib berilgan maydonimizni hamda o'z hovlimiz, tomorqalarimizni tartibga keltirishimiz juda muhim. Mevali daraxtlarga, ekinlarga turli zararkunandalarga qarshi ishlov berishni o'z vaqtida bajaring;

ikkinchidan, kuz oyining qulay ob-havosida qisqa muddatlarda bir qarich ham yerimizni bo'sh qoldirmaslik uchun qisqa muddatda haydovni yakunlang;

uchinchidan, kuzda sovuq va namgarchilik boshlanmasdan oldin to'qsonbosti usulida ekish uchun sovuqqa chidamli sabzavot ekinlaridan sabzi, piyoz, osh lavlagi, karam, ko'kat sabzavotlar (ismaloq, ukrop, petrushka, selderey, kashnich, salat) ekinlarining urug'lari sepib ekib bo'ling;

to'rtinchidan, **"Tomorqa - daromad manbai"** shiori ostida har bir mahallarda sarimsoqpiyoz va to'qsonbosti ekinlar ekishni tashkil eting;

beshinchidan, **"Bir kontur - bir mahsulot"** hamda **"Bir mahalla - bir mahsulot"** tamoyillari asosida sarimsoqpiyoz va to'qsonbosti ekinlarini eking.

Aziz yurtdoshlar, hurmatli dehqon va fermerlar hamda tomorqa yer egalari dalalarimizda va tomorqalarimizda yetishtirilayotgan sabzavot va poliz hamda to'qsonbosti mahsulotlari bilan xalqimiz dasturxonini to'kin, hayoti farovon, bozorlarimizda arzonchilik bo'lishini ta'minlash har birimizning insoniylik burchimizdir! Barchani bu burchni sof vijdon bilan ado etishga chaqiramiz!

[Bizni ijtimoiy tarmoqlarda kuzating](#)

[Facebook](#) | [Telegram](#)

2024-09-20 14:56:57